

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ
ՊԱՏԳԱՄԸ ՄԵՐ ՏԻՐՈՋ՝ ՅԻՍՈՒՍ ՔՐԻՍՏՈՍԻ ՍՈՒՐԲ
ԾՆՆԴԵԱՆ ԵՒ ԱՍՏՈՒԱԾԱՅԱՅՏՆՈՒԹԵԱՆ ՏՕՆԻՆ**

(Սուրբ Էջմիածին, 2006 թ. Յունուարի 6)

«Յանուն Հօր եւ Որդւոյ եւ Հոգւոյն Սրբոյ. ամէն»:

*«Տեսէք որպիսի՝ սէր շնորհեաց մեզ Հայր, զի
որդիք Աստուծոյ կոչեցուք մեք»:*

(Ա. Յովհ. Գ. 1)

Սիրելի բարեպաշտ հայորդիներ.

Աստուածայայտնութեան սքանչելատես խորհրդի առջեւ վերստին կանգնած՝ յուսառատ ու բերկրաշատ հոգով ողջունում ենք ձեզ եւ աշխարհասփիւռ մեր բոլոր զաւակներին «Քրիստոս ծնաւ եւ յայտնեցաւ» աւետիսով եւ կրկնում առաքելի խօսքը. «Տեսէք, ինչպիսի՝ սէր շնորհեց մեզ Հայրը, որպէսզի մենք կոչուենք Աստուծոյ որդիներ»:

Աստուծոյ սիրով միաւորուել են երկինքն ու երկիրը: Աստուծոյ ողորմութեամբ երկինքն է բացուած: Աստղի պայծառ լոյսն է Բեթղեհէմից վեր, լոյսերի հետ՝ օրհներգութիւն հրեշտակների, որ լցնում են պարզ մտուրը, որտեղ իմաստուն մոզերն ու մաքրասիրտ հովիւները խոնարհում են մանկացեալ Աստուածորդուն: Խնդութիւն է, յոյսի աւետում, քանզի ծնունդ է Փրկիչն աշխարհի:

Փրկչի յայտնութեան աւետիսը քարոզում է երկու հազարամեակ՝ ուսուցանելով ի լրումն ժամանակի մարդու փրկութեան համար Աստուծոյ Միածին Որդու մարդեղանալու, աշխարհ գալու եւ մարդկանց մէջ բնակուելու մասին: Նրանով մարդկային բնութիւնը միաւորեց աստուածայինին: Ով յաւիտեաններից առաջ է, մտաւ ժամանակի մէջ, որպէսզի բացայայտի պատմութեան եւ մարդկային կեանքի իմաստը, եւ լինի նոր մարդ ու նոր աշխարհ, հաւատարիմ ու հարազատ՝ Աստուծոյ սիրող, արարող եւ օրհնող Էութեանը. «Նրանով ճանաչեցինք Աստուծոյ սէրը մեր հանդէպ», Աստուծոյ փրկարար կամքը: Ի՞նչ ունի պատասխանելու մարդը այս շնորհին, բացի հաւատարմութիւնից: Ի՞նչ ունի կառուցելու աւելին, քան իր հոգու մէջ տաճար Աստուծոյ:

Աշխարհի անցուդարձի մէջ մենք յաճախ դժուարանում ենք լսել Աստուծոյ ձայնը, դըժուարանում ենք տեսնել Տիրոջ ճշմարիտ դէմքը եւ յաճախ աւելի ապաւինում ենք մարդկային մեր ուժերին, որ միշտ տկար են առանց Աստուծոյ: Աւելի ապաւինում ենք տարբերակելու, գնահատելու մեր ունակութեանը, որ անկատար է առանց Աստուծոյ: Առանց Աստուծոյ նիւթապաշտութիւնն է իշխում սրտերին, ատելութիւնն է յաղթանակում եւ առաջնորդում մարդկանց գործողութիւնները: Այսօր էլ խաղաղութիւնը վտանգուած ենք տեսնում շատ տեղերում, արհամարհուած են մնում մարդկային իրաւունք, ազատութիւն ու արդարութիւն, մրցավազքերի ճանապարհներին մարդը հեռանում է մարդասիրութիւնից, աշխարհը՝ իր Արարչից:

Այսօր Աստուծոյ յայտնութեան, մարդկանց մէջ ներկայութեան, աշխարհի փրկութեան Սուրբ Աւետիսն է հնչում: Շնորհն ունենք ժառանգակից լինելու մեր Տէր եւ Փրկիչ Յիսուս Քրիստոսին, Ով գալիս է խաղաղութեամբ, արդարութեամբ, ողորմութեամբ, որպէսզի չցամաքի սէրն այս աշխարհից, գալիս է աստուածային զօրութեամբ՝ անվախճան լոյս սփռելու եւ կեանք: Աստուծոյ հետ է կենդանութիւնն ու յաւերժութիւնը, բարին ու բարիքը: Նա է Տէրը եւ հայրական տնօրինութեամբ դէպի փրկութիւն է առաջնորդում տիեզերքը: Նրանն է իշխանութիւնը, որ այսօր վերստին Սուրբ Ծննդեան խորհրդով երեւում է մեզ փառքով ու զօրութեամբ: Լրացել է ժամանակը: Փրկութեան շնորհով թագադրուած է տիեզերքը, աստուածային սիրով ու սրբութեամբ նորոգուած է մարդկային կեանքը: Արդ, ամենը, ինչ խորհում ու գործում է մարդը, սիրով թող լինի, Աստուծոյ համար լինի, եւ կլինի աշխարհի խաղաղութեան ու շինութեան համար եւ կլինի մարդկանց ուրախութեան ու երջանկութեան համար՝ արժանի Տիրոջ գովասանքի խօսքին ու գնահատանքին. «Քաղցած էի, եւ Ինձ կերակուր տուեցիք, ծարաւ էի, եւ Ինձ ջուր տուեցիք խմելու, օտար էի, եւ Ինձ ձեր մէջ առաք, մերկ էի, եւ Ինձ հագցրեցիք, հիւանդ էի, եւ Ինձ տեսնելու եկաք, բանտում էի, եւ Ինձ այցի եկաք ... քանի որ Իմ այս փոքրիկ եղբայրների համար արեցիք, Ինձ համար արեցիք» (Մատթ. ԻԵ. 35-40):

Սիրելի բարեպաշտ ժողովուրդ հայոց, «Անհասանելի Աստուծոյ անընդմիջելի մերձաւորութեան» այսպիսի վստահութեամբ մեր հայրերն ապրել են, ստեղծել են հաւատով ու յաղթանակել հաւատով: Փրկչին ապաւինած՝ խաւարների մէջ լոյս ենք գտել, մահերից՝ վերածնունդ: Դարեր, ձիգ դարեր օտարների ասպատակութիւններից, կեղեքումներից ու ջարդերից հալածական ու աշխարհով մէկ սփռուած՝ հաւատով միասնական ենք մնացել Առաքելական մեր Սուրբ Եկեղեցու թելերի ներքոյ՝ հոգու մեր հայեացքը միշտ ուղղած դէպի Արարատի շուրջ տարածուող հայրենի մեր երկիրը բիրիական: Մեր հաւատի մարմնաւորումն են այսօր Հայաստանի պետական անկախութիւնը, Արցախի ազատութիւնը եւ Սփիւքի կեանքում ազգային ու հոգեւոր նորագարթօնքը: Հաւատով ձեռքբերուածը հաւատով պիտի պահպանենք, ամրապնդենք եւ զարգացնենք՝ սիրով, միաբանութեամբ: Ճանապարհ ունենք դեռեւս անցնելու: Պատուիրանասիրութեամբ, քրիստոնէական բարոյականով ու արժէքներով ընթանանք դէպի մեր ժողովրդի միացեալ, վստահութեամբ լեցուն ու լուսաւոր գալիքը, դէպի նոր օրը մեր Հայրենիքի, որպէսզի մեր կեանքում իրողութիւն դառնայ աւետարանական ճշմարտութիւնը. «Եթէ սկիզբը սուրբ է, սուրբ է եւ զանգուածը, եւ եթէ արմատը սուրբ է, ապա և՛ ռստերը» (Հռոմ. ԺԱ. 16):

Այսօր գոհութեան մաղթանք եւ օրհներգութիւն ենք մատուցում Մարդացեալ Աստուածորդուն, որ փրկութեան աստուածային շնորհին ու յոյսին ապաւինած ազգս՝ ցեղասպանութիւնից վերածնունդ, անկախ պետականութիւնը վերականգնած՝ իր ներդրումն է բերում պետութիւնների ու ժողովուրդների բարի յարաբերութիւններին ու համագործակցութեանը եւ տարբեր ազգերի ու մշակոյթների կողքին մասնակից է մարդկութեան խաղաղ, ստեղծագործ կեանքին:

Շնորհանորդ այս օրը հայցում ենք, որ Փրկիչն ու Տէրն ամենայնի բարօրութեան ու հոգեւոր պայծառութեան մէջ պահի մեր ժողովրդին, յաղթութեամբ պսակի Արցախի ազատ ապրելու իրաւունքը եւ Հայոց ցեղասպանութեան ճանաչման ու դատապարտման արդար պահանջը: Աղօթում ենք, որ ամենախնամ Իր զօրութեամբ ան-

փորձանք պահպանի աշխարհը համայն, բոլոր ժողովուրդներին, հեռու՝ աղետներից, աղքատության չարիքից, պատերազմի ու ահաբեկչության արհաւիրքներից ու սարսափներից եւ օրինի ժողովուրդների բոլոր ջանքերը աստուածսիրության ճանապարհներին, ուր յոյսն է գալիքի եւ բարիքը մարդկության:

Աստուածակառոյց Մայր Աթոռ Սուրբ Էջմիածնից՝ Հայոց Բեթղեհեմից, եղբայրական սիրոյ Մեր ողջոյնն ու բարեմաղթանքն ենք յղում Առաքելական մեր Սուրբ Եկեղեցու Նուիրապետական Աթոռների գահակալներին՝ Ն.Ս.Օ. Տ.Տ. Արամ Ա. Մեծի Տանն Կիլիկիոյ Կաթողիկոսին, Երուսաղէմի հայոց Պատրիարք Ամենապատիւ Տ. Թորգոմ արքեպիսկոպոս Մանուկեանին, Կոստանդնուպոլսի հայոց Պատրիարք Ամենապատիւ Տ. Մեսրոպ արքեպիսկոպոս Մուրաֆեանին եւ մեր Եկեղեցու ուխտապահ հոգեւոր ողջ դասին:

Տիրոջ Սուրբ Ծննդեան աւետիսով ողջունում եւ Հայրապետական Մեր օրհնութիւնն ենք բերում հայոց պետական աւագանուն՝ գլխաւորութեամբ Հայաստանի Հանրապետության Նախագահ Տիար Ռոբերտ Քոչարեանի: Մեր օրհնութիւնն ու ողջոյնն ենք յղում Լեւոնային Ղարաբաղի Հանրապետության Նախագահ Տիար Արկաղի Ղուկասեանին եւ պետական այրերին: Օրհնում ենք Հայրենիքի պաշտպաններին, զինուորեան, կրթութեան, մշակոյթի ու արուեստի գործիչներին, եկեղեցական վարչութեանց անդամներին ու հաւատաւոր մեր ողջ ժողովրդին:

Ի Քրիստոս սիրով ողջունում ենք Հայաստանում հաւատարմագրուած դիւանագիտական առաքելութիւնների ղեկավարներին ու ներկայացուցիչներին:

Աւետիս է Սուրբ Ծննդեան եւ Աստուածայայտութեան: Աւետիս է կեանքի նորոգութեան ու փրկութեան: Աղօթենք միասին, որ Աստուծոյ կենդանարար Հոգին բոլոր մարդկանց հետ լինի, եւ յաւելի ու առաւել եւս յաւելի հաւատ եւ յոյս, մխիթարի նեղութիւնների մէջ, զօրացնի դժուարութիւնների մէջ, պահպանի հաստատուն ու հաւատարիմ աստուածասէր ճանապարհներին: Եւ թող այս աշխարհում միշտ օրհնեալ լինեն ու առատ պտուղներ տան խաղաղութիւնը, ժողովուրդների եղբայրութիւնը, մարդկանց մէջ սէրն ու հաճութիւնը:

Սէր է շնորհել մեզ Հայրը, որպէսզի Աստուծոյ որդիներ կոչուենք: Մնանք աստուածապարգէւ շնորհի մէջ, եւ բարին ու խաղաղութիւնը Հայր Աստծուց եւ մեր Տէր Յիսուս Քրիստոսից կլինի մեզ հետ այժմ եւ յաւիտեանս. ամէն:

**Քրիստոս ծնաւ եւ յայտնեցաւ
Ձեզ եւ մեզ մեծ աւետիս**